

咸淳重修毗陵志

重脩毗陵志卷第十七

人物

二國朝

晉陵

胡宿字武平晉陵人登天聖進士第歷館閣知湖州廣學舍闢齊廬增弟子負湖學盛於東南安宅先生之教興皆其力也與司馬溫公同為考官二蘓以直言應制科時論翕然博學通陰陽慶歷間河北京東同時地震宿言必有內盜起於河朔未幾王則以貝州叛每謂同列曰宿以誠事主今

白首矣不忍絲髮欺君以喪平生之節官至樞密副使以太子少師致仕謚文恭從子宗愈

宗愈字完夫 嘉祐四年舉進士甲科 治平間召對擢同知諫院李定自秀州推官除御史宗愈即疏言執政任意超擢非當翌日知制誥蘓頌李大臨不草制皆落職歸班宗愈又以舍人封還詞頭坐是出判真州

哲宗拜御史中丞入對上問朋黨之弊宗愈曰君子義之與比嫉小人之姦邪則小人指君子為朋

黨進君子無黨論歷尚書右丞議脩簡

端脩宗愈子 大觀元年臣寮上言乞將 元符間

臣寮章疏分別邪正輕重之等大抵邪籍上中下三等皆天下正人端士以紛更 祖 宗之法為不便者所謂正等上中下皆偷 苟容左右反覆紛更 祖 宗之法為便者端脩以直言入黨籍邪等第四人紹興三年贈直秘閣

丁寶臣字元珍晉陵人與兄宗臣俱有文聲尤工於詩號二丁同登景祐元年第歷官至秘閣校理同

知太常禮院公在館閣久而朝廷益知其賢

英宗每論人物必稱之適智高入寇時守端州以南方備寡被罪尋復召用寶臣初識歐陽公於峽州集中有到夷陵時與元玲推官書即寶臣也文忠參大政言者以嘗薦寶臣借以撼文忠乃指前事出倅永州尋卒文忠祭以文且誌其墓今雙桂坊故宅基址尚在

錢公輔字君倚一字純老晉陵人為湖學高第皇祐二年試進士第二人熙寧間擢知制誥兼諫

院王安石得政與議新法不合安石退滕甫公輔
營解之安石主薛向公輔請黜之坐是責守江寧
初劉彝召見上問湖學門人在朝為誰彝悉數
以對至公輔則以簡諒稱後守婺州東坡有老手
便劇郡高懷厭承明之句為公輔作也

丁鵬字公黜舉嘉祐進士第眉山二蘓為同

年友以經學倡後進尤長於易春秋為文自成一
家方新法行李定用事辟為屬鵬辭以疾於是蘇
軾曾肇孔文仲諸公交薦之會司馬公當國曰士

大夫無不登光之門者丁君獨不來真自重之士
久之除太常博士入門下中書為左右正言時熙
河禽鬼章中外稱賀隲獨以為鬼章西番首領得
之不足為賀元祐間士大夫之儉險趨競者相
為朋比朝議有五鬼十物之號如唐八閩十六子
者隲上疏請寤治之後以胡宗愈親嫌繇儀曹出
知處州公有女適二蘓後子彭孫得甥東坡報以
詩隲賡云秀出眉山有慶門風流長與蜀山存翰
林未老生曾嫡想見累累百世孫有文集二十卷

蔣公之奇誌其墓

鄒浩字志完晉陵人登元豐五年進士第調蘓州
吳縣簿試學官第一改揚州教授移知安州孝感
縣改潁昌府教授元祐中除太學博士出為襄
州教授元符元年召對除右正言時章惇擅權
浩疏惇徇情廢法引所私分校要路沮格正人壅
遏忠諫復列惇六罪惇積怒會明年立劉后浩援
仁宗廢郭后并逐尚美人故事乞追停冊禮忤
上意惇黨因擠之謫新州

徽宗即位復官除正言遷左司諫起居舍人建
中靖國除中書舍人遷禮部侍郎改兵部 崇寧
初以寶文待制出知江寧府尋改杭州又改越州
未赴謫永州移昭州五年許歸常州 大觀間復
直龍圖閣以終初劉后為賢妃生子緣是得立然
生子纔三月堯后之立也浩三疏諫隨削其藁既
貶

徽宗初召還朝首喜歎諫立后事詢藁安在浩以
既焚之對及蔡京用事素忌浩乃使其黨為偽疏

謂本宮人卓姬生子后殺其母而取之其辭曰殺
卓氏而奪其子欺人可也詎可以欺天乎詔暴其
事以故再謫浩修潔有志行記鑒該摠援筆數千
言嘗授大學於二程先生以行義知名士之及門
問道者衆公每曰聖人之道備于六經千門萬戶
何從而入大畧在中庸一篇其要在謹獨而已典
教穎昌時守范忠宣命撰樂語浩辭忠宣不悅曰
翰林學士亦作浩曰翰林則可祭酒司業則不可
與陳忠肅為莫逆交天下稱鄒陳自為小官受知

於人終身不忘嘗輯薦者詞目曰懷恩錄嶺表既
歸即所居堂後闢小圃曰道鄉故知與不知皆稱
曰道鄉先生平生所著有文集易繫詞論語解孟
子解義若奏議則楊龜山為之序 建炎追復龍

圖閣待制 紹興贈寶文閣直學士謚曰忠子柄

柄字德文莊重篤學幼負俊聲侍忠公如二水黃山
谷一見深加嘆賞呼小友未弱冠棄科舉學從龜
山先生游先生期以大器每稱之曰是真有志於
學乃盡傳其業龜山門人以柄為稱首陳忠肅公

亦稱其才高識遠可以大受 靖康初以元樞李
公薦布衣補承務郎除編脩權給事疏請昭雪忠
公遷謫之非辜且不出 泰陵之意朝奏夕可贈
官贈謚典禮優渥天下偉之素以剛鯁聞剛外敏
中與人不苟合前後奏議炳炳真能世其家者著
伊川語錄一卷文集二十卷終天台守

周孚先字伯忱晉陵人 建中靖國初偕弟恭先從
伊川先生游與楊龜山相友善龜山好著書伊川
每以多言害道為戒謂孚先兄弟氣質淳明可與

入道其語邢和叔亦曰二周與楊時似同胞以所
疑為書請質于先生輒得親筆開諭服膺拳拳惟
以顏子為法程門高弟皆推之該詳太學特恩調四
明鹽場改建德尉皆不就 朝廷命白衣上殿賜
承事郎改奉議丐祠 紹熙間黃守灝奉孚先兄
弟祔饗于城東書堂

恭先字伯溫初見伊川先生先生曰從事覺有所得
否學者要自得乎先問如何可以自得曰思曰睿
睿作聖須是於思慮間得之又問顏子如何學孔

子到此深邃先生曰顏子所以大過人者只是得一善則拳拳服膺與能屢空耳兄弟俱由鄉薦入太學氣質不少異尤篤于信道釋褐授坑冶幹官每以沽名為戒謂子孫曰吾沒後毋為誌文碑銘以重吾不德終身恬于進取

胡瑄字德輝晉陵人登宣和三年第後受舉于元城先生暨歸先生曰子聰明能護以至道當成令器瑄遂以平日親承問答退而筆之名道護錄自為之序陳東上書攻六賊言者以瑄嘗潤色其書

攝他官與李綱同舟東下貶梧州人號蒼
梧太守 紹興初召試玉堂尋復元官兼史館校
勘先是奸人得志舊史蕪穢 上命程筆削貽執
政怒出守晉陵

吳懋晉陵人為禮部員外郎 建炎初金立偽楚

百官作勸進表懋當草牋奏度不可拒將自裁會
有幸非常者越職為之由是獲免王時雍用是坐
政事堂懋發憤罵曰反虜吾不能擊汝如段秀實
邪時雍面頸俱赤不能對後吳玠莫儔以表狀詣

金營懋竟不屈

胡交脩字已懋登 崇寧二年第 政和五年中詞
學兼茂科由翰林學士知制誥拜刑部尚書時

朝廷欲以兩蜀交子行之諸路交脩疏陳其害以
為崇寧大錢覆轍可鑒今之交子較之大錢固無
銅鐵鼓鑄之費一夫坐空舍中日作數十百紙必
以偽券抵憲網禍及無辜人服其精識從子世將
請祠

上不許嘗為答詔乃引嫌乃命舍人胡寅為之遂

為故事交脩兩除詞掖三侍經筵再入翰林渡江
後一人而已自文恭脩簡忠獻世掌內外制有四
世絲綸集

高宗嘗題御扇賜公云相門韋氏在經術漢臣須
拜端明殿學士

世將字承公晉陵人父嘗夢金甲二神人告曰吾唐
世老將後生二子因以名焉長即公也次唐老登
崇寧五年進士第累官至兵部侍郎出帥京口未
幾召還除給事中直學士院 紹興八年四川謀

帥上問刑部尚書胡交脩廷臣孰可將者交脩
薦世將可用遂除四川安撫制置使兼成都府始
公伯祖脩簡帥成都有治行父老曰不圖今日再
見吾父人方之張公詠號小乖厓吳玠年謀報虜
欲渡河未幾果陷同州世將駐師河池有參謀孫
渥勸退保世將指所坐帳曰吾誓死于此矣毋多
言乃分遣大將吳璘田晟郭浩楊政出戰數路並
捷朝廷命乘機出兵方行丁秦國憂詔起復世
將請老有星隕于營是夕以計間謚忠獻唐老守

鎮江遇戚方亂死之謚忠愍

丁逢字端叔晉陵人第進士為激賞所幹官會金主遣壻烏林答天錫賀上生辰怙貴騶黠侮館伴眾憤而莫能折公謂示弱何以為國上書乞借尚方劍斬虜使書奏

阜陵御批付虞相雍公曰此人材氣可尚卿可先一見速具奏來遂錫對故秩除國子監書庫官遷天府倅上留意邊事命知安豐盱眙二軍皆有政績由潼川漕除川秦茶馬凡供帳公費悉屬去

人服其廉馬政脩舉召還歷卿監尹宗邑帥合肥
進寶謨閣待制卒于官

蔣芾字子禮晉陵人 紹興辛未登進士第二人授
建康府推官秦檜欲羅致拒之檜怒終其身不召
用後附麗者皆竄逐芾獨免禍 乾道初權直舍
人院因 內侍梁琦語徹

德壽宮

上皇歎其忠除簽書樞密院條奏邊防軍功甚悉
孝宗尤極嘉獎拜右僕射同平章事 上方銳意

恢復芾力陳天時人事未可舉兵凡二千餘言忤
旨讒忌者乘之以正奉大夫致仕

蔡戡字定夫忠惠公襄四世孫居晉陵調溧陽尉督
捕應格置弗言登 乾道丙戌甲科得節五年所
部十四郡歲以敷銀為痛戡積鹽羨代輸迄今便
之陞漕易湖南憲時李昂霄有異謀傳道洶洶戡
乘其未定單車馳喻其黨相顧駭愕叩首服

寧宗朝為京尹歲澇糴艱甚亟請發粟民賴以濟
侂冑當國乃請老有定齋集行于世

錢之望字表臣晉陵人少放達喜奇計逆亮闖江以
策干虞公允文且謂虜有內潰之勢虞公行其策
亮果殞符離之敗道謁張忠獻請三邊並出師使
虜疲于奔命大功可立張公不能從 乾道五年
登進士第授江西帥屬賴文政猖獗兵鋒甚熾

朝廷旰食參政龔茂良薦之望可任且白 上屢
以此事遣倖文政除金部郎官知楚州募劾士五
百射自訓閱勁健齊一虜不敢謀大奚山盜起除
祕撰知廣州盜以舟師指城民大恐之望麾軍奮

擊一戰摧滅陞華文閣待制知廬州卒葉水心銘
其墓

錢相字君玉晉陵人幼穎異壯以詞賦有聲場屋冠
鄉薦登嘉定戊辰第初任如臯簿班改宰樂平
倅臨漳端平庚午西山真公薦諸朝擢告院遷
國子簿宗學博士未踰月為監察御史遷右正言
陞起居郎兼史筵權刑侍陞給事中吏侍嘉熙
辛丑同典貢舉歷兵禮吏書以親老丐歸除閣學
知婺州辭不就奉親歸里得請予玉隆祠登朝十

九年退閒又十四年年八十一終年德俱稱云

武進

張彥直字輔之武進人偽吳太尉訓之後累贈至太傅男七人篤意義方四子繇辟雍聯登 崇寧

大觀進士第皆歷官通顯彥養左右就養二十年踰八表與夫人俱無恙鄉邦榮之前太守典樂徐公申美其事表其里曰椿桂坊蓋取燕山竇諫議詩云

張巨字微之居武進擢嘉祐二年第舉明經少從安

定先生游居鄉與蔣之奇胡宗愈丁騫為四友學
易于歐陽文忠公公甚器之薦充國子監直講新
經行與同職數人相繼引去時論高之家藏文忠
往復書蹟甚富所著文集四十卷易解十卷文忠
公為之序

霍端友字仁仲武進人弱冠入太學通六經 崇寧
二年舉進士第一授昭慶軍幕官不閱月召見便
殿擢置冊府繇右史轉中書舍人遷給事中尋除
大司成遷禮侍除待制知陳州時中貴傳詔取瑞

香端友曰不可自我作俑疏罷之名還為吏部侍郎有所善者與蔡京厚嘗從容致京意欲升中執法端友不肯附麗忤京意官至通議大夫致仕贈少師有內制三十卷行于世

李端彥字相之武進人父鎮舉進士官至奉議郎著天潛集有古木直無巢野泉清絕釣之句為時人贈炙端彥以 崇寧二年登第臚唱丙科

祐陵覽其對親灑 宸翰云直諒可嘉特與升甲博學多聞其賢已集行于世官至宗學博士

施垌字林宗武進人以太學舍選登 崇寧第時方
創辟雍自鄆州教授召為直學太博選 宣和末除
除江東提刑朝命鑿銀林河通大江調役繁興垌
懼導江入浙蘇秀必受漂溺患亟抗疏寢其役

徽宗下詔獎諭進秩一等嘗除右正言辭不就出
持憲江浙福建守信州皆有能聲 紹興十二年
除禮部侍郎後以敷文閣待制終生平篤意孝養
所至得親庭書必冠帶跪讀遇恩奏補官及弟任
鄉里稱之

張舉字子厚武進人登元祐四年甲科親老不忍朝夕去左右閉門讀書四十餘年多所論著于古律詩尤清新家藏書至數萬卷工書精真草隸三體皆造古人妙處以大臣薦起為潁州教官三辭不就其後孫莘老范純夫諸賢交薦曰某樂死草萊後世必謂朝廷失士東坡亦力薦之以秘書校書召將大用舉迄不出崇寧間朝廷賜處士號卒謚正素郡守徐中表其里曰正素坊

李熙靖字安常武進人舉進士中詞學兼茂科除浙

東提舉命下乃得河東蓋省吏受賕陰以易之客
有得其情者誅熙靖使自陳熙靖曰事君不擇地
吾豈發人之私求自便乎時宰聞而賢之白于

上除兵部員外郎以言應奉司事忤宰相王黼積
四年不遷黼罷為中書舍人入對言燕雲初定宜
戒不虞上曰詩所謂迨天之未陰雨徹彼桑土
綢繆牖戶兩宮北狩張邦昌居攝以熙靖權直
學士院拒之憂憤廢食疾且篤謂故人曰百官何
日再朝天乎泣而卒贈端明殿學士

張守字子固武進人登 宗寧元年第中詞科除詳
定九域志編脩官擢監察御史上防淮渡江六事
請詔大臣以選將治兵為急時相滋不悅以守撫
諭京城力陳虜必入寇狀願早圖之未幾虜果踐
淮 大駕南征有議幸蜀幸江陵者守與張公浚
力爭之其建駐蹕建康之議一日盛夏張公浚坐
息東閣時守已參大政突入執浚手言曰守向言
今與同列徐考其人似與昔異不免有患失心是
將為天下憂盖指樞密秦檜也以祠改郡 上眷

守不衰建康謀帥 上曰非守不可至鎮數月卒
上嗟悼曰君子人可惜謚忠獻張公浚誌其墓曰
孝友似張仲文章數班馬云

無錫

杜鎬字文周無錫人性篤學南唐舉明經 國朝歷
崇文院檢討

太祖將南郊嘗見鎬謂宰相趙普曰當祭而日食
猶廢祭况天變如此乎普言于 上迄罷其禮

景德初置龍圖閣待制首以鎬為之澶淵凱還遇

懿德皇后忌日或以軍中鼓吹為疑馳騎問鎬鎬對曰武王載木主以伐紂前歌後舞可據也 祥符二年种放告歸 上宴餞于龍圖閣賜詩命侍臣皆賦鎬辭以素不屬文詔引名臣歸山故事鎬即誦北山移文蓋譏之也

真宗每得古器異書必詢鎬皆能究其本末時人服其該洽至禮部侍郎孫杞

杞字偉長性豪邁遇事敢為廣西歐希範反推蒙趕為帝而自號為神武公率其徒破環州轉攻桂管

執甚熾

仁宗憂之授杞廣西轉運安撫使杞馳至宜州以
觀其變先令吳香區世弘等說其首豪乘間急擊
斬首千餘級焚其積聚蒙趕懼而降希範走保荔
支峒併禽戮之廣右平除天章閣待制知慶州蕃
首孟香率部落內附夏人以兵索香有詔還之杞
言彼違約舉兵香不可與因移檄問罪夏人誓服
慶曆中范公仲淹參知政事患諸路監司不才
多所更易杞與張昱之首被擢用杞博聞強記通

陽上當脫陰
字知當作如

陽每自推數曰吾年不過四十六卒知其言

錢顛字安道無錫人舉進士熙寧間召為監察御

史裏行王安石初行新法宰臣曾公亮依違不言

顛與侍御史劉琦上疏論安石歷官以來莫不言

尊尚堯舜故天下以為賢陛下亦聞而知之遂致

公輔今乃首以財利之說務為容悅言行乖戾剛

狠自任不知安石之心待陛下為何如主曾公

亮位居丞弼被遇三朝自當悉慮竭忠以身許國

反有畏避安石之意更相稱意以固寵榮安石大

怒貶顓監衢州鹽稅琦亦坐謫顓將出臺責御史
孫昌齡曰君如事安石以得御史亦當少念報國
顓今得罪分當遠竄君為美官自以為得策即我
視君犬彘不若也聞者悚然東坡詩所謂烏府先
生鐵作肝是也

素植字材老無錫人登 崇寧進士第詞學兼茂科
為監察御史金人入寇陳邊防十三事以誅佞人
為先不納引疾休致 建炎召為左司諫直言忤
臣黜守岳陽會虜騎大入叛臣李允文據昴擁

衆怙亂公條奏其狀遂遇害允文誅贈直龍圖閣
陳敏字伯脩無錫人喬六世孫也登 崇寧三年第
少孤力學安定先生一見竒之曰此錫山之英也
年十一廬親墓有芝產于冢複葉並蒂色紫而澤
人謂陳氏之祥

徽宗朝諸蔡用事斥司馬公諸賢為姦黨令州郡
皆立石守倅刻銘焉敏通守天台監司促之急蒼
曰誣司馬公為姦臣是誣天也倅自立石敏碎之
囚其石工官吏悚慄言于敏懼劾敏曰我死且不

辭何効之畏竟挂冠不仕號濯纓居士東坡聞而
壯之遺書云風義凋喪植立于頽波狂瀾中惟吾
伯脩與景純而已

景純力學士也

陳之茂字卓卿無錫人喬九世孫也入太學與張公
九成同登第之茂廷對忤權相以雜犯黜之九成
舉第一叩頭殿階曰臣之學不如陳之茂臣不當
成之茂能言人之所不敢言宜獎不宜黜

高宗覽對悚然曰忠言也賜同進士出身調休寧
尉以經學為諸儒倡張魏公薦于朝仕至吏部

尚書

李端行字正達無錫人與弟尚行入太學俱有俊聲
同登 大觀三年第呂丞相頤浩嘗師之逮貴猶
執弟子禮為太常博士高麗遣子入學夷禮不革
趨揖無聲宰相蔡京入學議革之端行曰用夏變
夷未聞變于夷者當繩以國禮遽趣賓贊引高麗
子即日成禮于學禮法皆裁于端行人服其得體
後作詩詆京之失出宰鄞縣發憤終身不仕

李祥字元德無錫人登 隆興元年第為國子祭酒

慶元六年丞相趙汝愚為言者所譏乞免相詳力
爭曰汝愚決策立陛下天下晏然社稷臣也精
忠怫鬱何以示後世除直龍圖閣漕京湖言者怒
劾祥與楊簡罷之太學六士楊宏中周端朝等上
書固留不聽言者喜曰道學散矣六士隨亦罹禍
歸無錫絕口不道前事嘉泰元年謚肅簡葉水
心銘其墓

尤袤字延之無錫人入太學登紹興十八年第後
工部玉泉喻樗遊樗龜山先生高第也樗以所得

龜山講明授之由是學益進 紹興間宰泰興金
人犯境官吏望風遁去獨堅守不去當路交荐官
奉常時

高宗廟號未定方議叔配公誦經訂古悉有根據
人號為尤書厨為內外制及內禪典冊皆服其雅
正有體官至禮部尚書表形貌不逾人而風度端
凝

孝宗嘗有短小精悍之褒晚年嗜書不倦藏書至
三萬卷為詩平淡陳 齊嘗列之四詩將自號遂

初居士

光宗在東宮因書二字賜之有遂初小集六十卷
內外制三十卷藏于家

焞字伯晦以大父表奏任嘉定初元換授山陽法
曹會蕭德慶犯鹽城郡檄撫諭事定就畀邑宰故
秩倅海陵參東淮制幕端平更化入為軍器監簿
遷大府丞檢詳編脩權右司將漕西淮兼帥升農
少總餉淮西再入除理卿遷

出為福建帥漕

改沿江制副尋擢祕監侍講登從索兼直院知太

平州不赴以內祠奉朝請兼侍讀復貳春官兼脩
史擢工書繇禮書升內翰拜為端明學士擢舉秘
書省提綱史事開國毗陵郡敷歷中外踰三十年
晚力抗疏丐祠年八十三以疾終于家自號木石
稱於世云

蔣重珍字良貴世居錫山之富安讀書一覽即記

嘉定癸未擢進士第一人授湖州幕郡大水與太
守說荒政不合引疾丐祠息意榮進即所居築梅
堂以琴書自娛 紹定己丑召對三疏 時以

為朝陽之鳳尋上六箴 端平更化以左 經
筵與魏雀山真西山為深交其所講明皆聖門義
理卒謚忠文

薛極字會之武進人後居錫山少 鞠於諸 讀書
日記萬言以父任調上元主簿習詞學中詞科為
大理評事通判温州以寺正召出守桐川丐祠不
許 嘉定改元召入會以參政樓鑰荐歷左右司
樞密副都承旨時

朝廷議更楮

有力焉除刑部侍郎

兼檢正未幾除刑部尚書兼戶部遷吏部十五年
賜正身簽書樞密院事奉

寧皇山陵使竣事遷參知政事除樞密使封和國
公性通敏立朝三十餘年多所裨益以觀文殿
大學士終

宜興

蔣堂字希魯宜興人舉進士明道初為侍御史郭
后廢堂與范公仲淹孔公道輔極言不可坐黜為
河南發運使歲荐禮部二百人或疑其溢額將得

罪堂慨然曰拔十得五亦足以報國矣知益州州有漢文翁石室在夫子廟因廣其舍為學宮選屬官及鄉士之賢者教諸生儒風翕然後以禮部侍郎致仕堂為人脩潔遇事不少屈好學工文詞尤嗜作詩多傳于世

邵靈甫宜興人侗儻樂施于家蓄穀數千斛 咸平大饑或人請糶靈甫曰是急利也請損直曰是近名也或人又請曰饑將自豐乎答曰有成畫矣乃盡糶所儲得五千三百斛自縣至湖汝鎮除

道四十里浚蠡湖橫塘等水路八十餘里通輦畫
溪入震澤邑人爭受役皆賴以活子梁登進士第
孫剛魁南省蓋為善之報云

余中字行老宜興人幼穎悟 熙寧五年偕兄貫試
禮部中與選而貫黜請自黜以荐兄有司雖不許
士論嘉之次年魁廷對 紹聖三年專對虜使還
奏河朔城隍墮圮乞從密院行下葺治以戒不虞
宣靖間金人長驅城守多不固議者始思其言以
雲川守致其仕

蔣之奇字穎叔宜興人 嘉祐二年第進士舉賢良

方正

英宗初選殿中侍御史陳謹始五事進忠賢退姦
邪納諫諍遠近習閑女謁凡數百言時論偉之歷
江淮荆浙等路發運副使 元豐六年漕粟京師
至六百二十萬石鑿泗州股河以避長淮之險自
是無覆舟之患

哲宗朝知廣州以平寇功除寶文閣待制知熙州
謹斥堠脩守備羗不敢犯 紹聖中道鄉鄒公以

言事獲罪之奇折簡贈別坐責守汝州 崇寧除
觀文殿學士知杭州于東坡為同年進士嘗與定
卜居陽羨之約有文集雜著百餘卷子階孫興祖
階字夢錫登 元祐三年進士第宰執以明經薦

徽宗擢為大司樂與梁師成議樂舞不合師成怒
階荅曰一代禮樂當質經不顧而去燕雲初復廷
臣議上尊號階曰

裕陵却徽號為萬世法奈何諛悅以虧盛德知興
元府軍卒王靖作變階禽戮之曉諭餘黨帖服後

引疾奉祠鴻慶宮

興祖以蔭調饒州司錄事方臘叛放兵四掠興祖曰
郡守糾吏士輯戰具盜不敢謀知陽武縣金人犯
京師道其境或勸興祖避之興祖曰吾世受國恩
此吾死所也監兵有與賊通者興祖斬以徇虜騎
來敗之而去明日虜益濟師再戰不敵遂死之
贈朝散大夫載國史忠義傳

虞大熙宜興人登 皇祐二年進士第

神宗朝陳密學 在經筵以治行薦凡臺閣選所

薦三十二人大熙與胡宗愈皆預焉累遷至侍講
單錫字君賜登嘉祐二年第明陰陽圖緯星歷讀
書無不該貫與東坡為同年進士坡愛其賢以女
兄之子妻之來宜興每寓其家錫卒坡祭以文從
子發舉八行科有風土記傳于世孫時

時字行可登宣和六年第隆興初召為國子監
主簿遷秘書丞乾道元年擢監察御史上封事
言飲酒擊毬二事

孝宗喜謂輔臣曰擊毬朕放下多時飲酒朕當自

戒五年春除右諫議大夫 上以目疾久不視朝
及御殿復上疏以諫 上面諭曰卿言可謂愛朕
是冬卒 上為之慨惜

邵材字聖規宜興人 熙寧五年試開陽第一與父
潛同年進士嘗為監察御史郡有以疑獄上者刑
部謂當貸死用事者謂殺人不可貸乃欲坐所奏
且著令材抗疏論曰疑獄當貸者不貸而奏者反
獲罪恐獄吏便文自營不復以疑獄聞矣時王安
石當國司馬公極論新法之害一日語材曰劾去

司馬大官可立待材毅然曰君實正人也可厚誣之乎安石歎曰有是哉可以去矣即自劾歸後以鴻臚卿乞祠而卒

錢即字中道宜興人登熙寧九年進士第授安州司理初莅事更有誣服抵死罪即明其寃守將欲薦之答曰治獄得情職也擠人以論功非吾志調睦州推官有寃獄久不決部使者檄往按治且誘以薦剡即折獄平反全活二十三人或謂之對曰吾寧老選中忍以數十人命易一薦哉卒不受歷

鄜延環慶經略安撫所至有聲績童貫宣撫陝西
患物價騰踊嚴設科條又行均糶法陝西騷然即
上疏力詆時貫權傾中外人皆危之不顧也坐是
謫永州後以龍圖閣學士致仕謚忠定

唐棣字彥思宜興人初從伊川先生問學先生曰入
德之門無如大學今之學者賴有此一篇書其他
莫如語孟棣自是有所得遺書載問答甚多纂次
伊川語錄百餘條方之門人記錄為詳

周義字立義宜興人 宣和六年第進士甲科

高宗朝兩為言官論事皆觸權要不得其言而去
歷典江浙數大郡

孝宗即位首被超擢時朝議主恢復義累疏陳虜
未有釁不可輕舉忤旨符離退師上思其忠除
政府嘗因召對言臣初為言官晚忝侍從事有不
可大即論奏小則堂白言雖不盡從固無愧於心
出為州事苟難行反覆條奏不從委曲行之不從
不至受弊亦無愧於心惟預政已來每與宰相議
天下事大率十事之中勉書七八此為有愧耳

上嘉其誠以資政致仕謚簡惠自號惟心先生
邵及之宜興人 乾道中為司封郎時楊和王子俊
在宥府乞襲封吏部長貳欲上其事吏以牘呈及
之曰 國朝故事異姓王無襲封者雖趙韓王開
國元勳亦止及身而已斥去之尋上章告老不許
請益力除直徽猷閣致仕

孝宗嘉之語輔臣舉漢公卿餞二疏故事由是朝
士皆作歌詩燕餞為一時盛觀

呂祖泰字泰然居陽羨 嘉泰元年以進士論韓侂

曹陳自強蘇師旦周均書出中外大駭有旨祖泰
挾私上書語言狂妄杖決流欽州就逮不愆京尹
受侂胄計誘之曰誰教汝有共為草者汝第言之
吾自寬汝祖泰笑曰何問之愚也吾自分必死而
受教于人且與人議乎京尹曰汝病風喪心邪荅
曰以吾觀之今之附韓氏而得美官者乃病風喪
心也廷中間之皆悚然歎息四年侂胄死史相當
國求祖泰所在欲官之得旨自便補上州文學改
迪功郎監潭州南嶽廟 疾卒年四十九

重脩毗陵志卷第十七

重脩毗陵志卷第十八

人物三

寓賢

湛茂之宋人為司徒右長史隱于無錫之慧山與南
平王劉鑠為友更以詩章唱酬今普利院即茂之

別墅也

詳見留
詠門

任昉梁人為義興太守邀到洽到溉為山澤遊時有
彭城劉綽劉苞劉孺吳郡陸倕張率陳郡殷鑄沛
國劉顯及溉洽號蘭臺聚縣北一里有釣臺即昉

垂釣之所至今呼為任昉臺有詩

見留詠門

薛戎字元夫河中人客陽羨山年四十餘不仕江閩
觀察辟寘幕下歸復放浪稍遷河南令後歷浙東
觀察使居官不詭名譽解去人多思之

杜牧之唐人殖產陽羨因卜居焉今荆溪北有荒址
舊即牧之水榭題詠甚多如贈許七侍御酬邢刺

史等作多寓情於陽羨

詳見留詠門

李蟻嘗於廣教禪院肄業後以夢虱易名登第

詳見觀寺

門

李幼卿字長夫大歷間以右庶子守滁州嘗於義興

玉滌作山居與獨孤及屢有倡酬

見詞翰門

權德輿字載之父臯自秦徙南徐德輿纔七歲從至陽羨及壯追念昔遊嘗送義興袁少府及從弟况赴義興尉序有追思童年遊寓茲地之語其與渾淪先生文亦稱壯歲過於荆溪云

陸希聲唐人相昭宗避亂隱陽羨之湖洑名其山曰

頤山自號君陽遜叟著頤山錄及山居二十七詠

見留詠門 蔣穎叔題希聲宅詩有云二十四亭蕪沒盡

溪邊猶有故時槁其逸居之勝盖可想見

張訓字克明滁之清流人與楊行密號三十六英雄
孫儒為亂從行密擒儒有土軍陳可兒竊據毗陵
訓受命克常州都虞候掩其不備而圖之可見計
無所措果出迎接訓於馬上察其色變乃手刃之
入城綏撫一軍帖然景福中行密由毗陵入利港
赴廣陵中途謂左右曰張訓以一劍下此郡未嘗
自伐其功即授檢校右散騎常侍守常州刺史今
子孫皆家焉

陳喬廬陵人徙居錫山仕南唐開寶間 王師平金陵喬痛國亡殞命

太祖皇帝以其忠于所事詔以禮改葬

國朝

張鑄字希顏世居滁之清流後遷晉陵登 祥符進士甲科王安石其門人也歷官南陽帥與姪昱之並以光祿卿致仕縉紳榮之杜祁公諸賢各以詩贈鄉人即居地號東西二鄉

昱之字景山登 祥符八年進士第蔡文忠薦其材

為淮南提點刑獄時楊崇勳恃恩恣橫懼昱之嚴
正帖不敢犯 慶歷選諸路監司昱之與杜杞首
被擢用後以光祿卿致仕公卿賦詩凡百餘人杜
祁公為之倡陳述古作序引時人榮之

蘇軾 嘉祐二年與蔣穎叔連名策第宴瓊林日坐
相接遂約卜居陽羨邑人單錫亦同年進士軾以
甥女妻之屬以問田後謫黃州移臨汝上章乞居
陽羨謝表有云買田陽羨誓畢此生嘗托邵民瞻
買宅一區為緡錢五百將挈居偶與邵步月村落

聞老嫗哭聲甚哀異而問之答曰吾家有一居相
傳百年今吾子不肖售諸人所以悲耳叩其居即
邵所得亟取券對嫗焚之竟不索直自是亦不復
問舍寓於碩塘橋孫氏之室而歿其風誼如此

詳見

祠廟門

楊時南劍州將樂人與游定夫謝顯首同時為程門
高弟學者推之陳忠肅每貽詩必稱以先生 政
和元年待次越州蕭山知縣自京過毗陵寓早科
巷時道鄉鄒公已病公首即卧內就見是冬鄒公

卒公為文祭之明年赴蕭山任及滿奉祠遂徙居
毗陵講道城東書堂既罷祠官貧甚不果赴部郭
慎求在朝以書問所欲公年已七十矣答以欲求
一筦庫為貧耳慎求為授常州市易務公聞之曰
非見闕於吾事無濟況市易事吾素不以為然縱
得祿其可就乎卒不赴五年以秘書郎召赴闕

靖康初除右諫議大夫未幾力丐歸 建炎初除
工部侍郎明年夏以直學士奉祠是冬始還將樂
公居毗陵者十有八年如養浩堂踵息菴諸記中

庸辭義伊川易傳泰山春秋傳諸序皆當時所著也邦人今即其地祠之。

賀鑄字方回開封人 孝惠皇后之族孫好學藏書萬卷工文詞尤長于樂府寓居毗陵著荆溪集陽羨歌以右班換文倅太平州而卒葬於義興之篠嶺坡詩有云解道江南斷腸句只今惟有賀方回號鑑湖居士

王居正字剛中 建炎初自江都徙居陽羨為舉子時恥用王氏說既第嘗著三經辨學 思陵朝恚

上送官尤為宰臣范宗尹所知仕至兵部侍郎自
號竹西

李綱字伯紀邵武人 建炎初作相為汪黃所沮去
位嘗遊南嶽有詩贈寺主及留題善卷寺後居錫
山自號梁溪漫叟有梁谿集二十卷

汪藻字彥章鄱陽人壻于義興莊氏愛谿山之勝因
卜居焉自 崇寧初策高第校三館秘書尚符璽
立柱史遂贊書命入翰林掌內制仕朝廷三十年
以文學議論推重一世所為詩文千餘首號浮溪

集傳于世

陳克字子高天台人有詩名 紹興中為敕令所刪
定官自號赤城居士寓居義興之潼渚

周麟之字茂振海陵人登 紹興二年第中宏博科
金亮渝盟將出使疏陳七不可之說

上以為然擢知制誥請復賜

熙陵所書玉堂兩大字從之今為翰苑盛事詔撰
張循王墓碑奏御 上批其後曰叙事詳盡造語
簡要披覽再四但有歎嘉嘗受旨作立皇子詔有

非朕敢私之語 上讀之稱善終于知樞密院

胡松年字茂老海州人 建炎初入西府 紹興間
奉祠居陽羨之言村築堂以自娛扁曰橫山孫仲
益記其事甚詳

重修毗陵志卷第十八

重脩毗陵志卷第十九

人物四

遺逸

季子耕於延陵為聖人所予清規姱節照映千載繇是潛深伏隩之士代不乏人弗書則將湮沒無傳焉用次所聞以諗來者

晉陵

漢

陸璣字仲芳毗陵人操履清正明京氏易尚書風角

星筭皆極精奧辟主簿視事旬日謝病去隱會稽

山

見毗陵先賢傳

陳

何之元世居廬江好學有才思為信義令宗人敬容位通貴顯訪其之元終不一造或問之對曰德薄位隆覆敗可待吾懼及禱耳識者稱歎著梁典三十卷隱居晉陵隨開皇間卒

唐

竇羣字丹列京兆金城人兄弟皆擢進士第獨羣以

處士客毗陵傳啖助春秋著書數十篇以韋夏卿
薦德宗朝為左拾遺

國朝

龐安仁字宅道居城南通五經尤長于易開門授徒
張正素鄒道鄉諸公皆嘗執經今天慶觀西廡竇
諫議陰德錄石刻蓋其所書

霍洄字大清端友從孫居城東之梅坡喜為詩自號
筠寮嘗宿田舍見催科吏賦詩云北風吹晴屋滿
霜翁兒赤體悲無裳閨中幼婦飢欲泣忍飢取麻

燈下緝一身勿暇私自憐鳴機軋軋明窓前織成
五丈如霜布翁作旋襪兒作袴明朝官中租賦急
依然赤體當風立歲饑道殍守多出遊又云朝來
五馬去尋春誰信家家甌有塵枕藉道傍宜細問
恐非芳草醉人守聞而止

武進

唐

施肩吾擢進士第後隱洪州著閒居詩以見志

無錫

國朝

錢道人逸其名顯之弟隱慧山蘓文忠贈以詩云毗陵高山錫為骨陸子遺味泉水齒賢哉仲氏早拂衣占斷此山長洗耳

宜興

唐

李勣字定臣神堯七世從孫幼孤好學掇薪自爨夜無然膏默念所記後舉進士試日吏唱名乃入勣取之徑反江東陽羨里人有鬥爭不之官悉詣決

嘗集詩之類古者斷為唐詩以譏元白之失云

陸勳嘗寓義興李郢有寄題陸校書禪居詩云惠遠
烟霞在方平杖履隨

蔣逸人失其名錢起嘗宿荆溪賦詩送歸山中

陸龜蒙字魯望元方七世孫少高放通六經大義樂
聞人學性嗜茶置園頽渚山下自判品第嘗升
舟設蓬席齋束書茶竈筆床釣具往來謂江湖散
人或號天隨子甫里先生

皇甫冉字茂叔丹陽人天寶中調無錫尉避亂居陽

羨

陶詳校書隱居陽羨方干有陽羨山中笑傲情之句
後遊張公洞又寄以詩

高雲寓陽羨皇甫冉嘗題客舍云吳國滯風煙平陵
延夢想惟將山與水處處諧真賞

國朝

王无咎字補之建昌人 治平中來遊著許氏園墮
星記後卒葬靜樂山

慕容暉父惟良領州刺史因家陽羨嗜酒好吟不務

進取所居有雙楠軒聳如蓋嘗從蘇文忠游自謂
雙楠居士王平甫寄詩云坐唱月華青嶂外行吟
恍起白鷗邊從子彥逢

詳見門

蘇庠字養直丹陽人幼為清江引蘇文忠見而竒之
遂知名志不樂仕客居陽羨號後湖居士

元溥字泉卿幼業進士輒棄去喜為書自號耘軒有
歲後書懷云他鄉故鄉老若此新歲舊歲窮依然
烹茶但有二升水沽酒初無三百錢其處約安貧
亦可尚云

旌表

孝弟人心之天移風易俗莫此焉急是邦巷居里處
比比以孝義名表而出之為善者勸

晉陵

宋

余齊民少有孝行傭書以養大明二年父卒于家訃
未至齊民忽語人曰比肉痛心煩甚如割必有異
故尋得報日夜行四百里母子相對慟絕復蘇問
父遺言母曰恨不見汝齊民曰相見何難亟走殯

所號頓而殞郡以事聞詔更所居里曰孝義賜其

母穀百斛

孝義避
下一字改曰孝仁
太宗御名

薛天生其母懼艱棘嘗蔬食天生亦蔬食母未免喪
而逝天生終身不嗜魚肉齊建元三年詔表門閭

齊

劉懷嗣與弟懷則十餘歲喪父衣不絮食不鹽豉建
元三年詔表門閭

隨

陳司徒果仁事母以孝稱母病思牛炙適屠禁割股

股作羹以進病良已郡上其事詔遣大夫楊績賜
旌表後廟食封武烈帝

唐

劉子翼字小心初仕隋為著作郎峭直有行面折僚
友家無餘貲正觀初召用以母老辭詔許終養江
南巡察大使李襲譽表所居里曰孝慈

趙氏吳康之妻父亡弟幼歲饑母且病丐粟以給長
歸康之尋卒家欲更適誓死不貳

國朝

孫達母周氏刲股起父疾嘗戒達勿從王舍陵學母卒達哀毀盡禮 崇寧間李守孝節為請旌表

淳祐六年裔孫錫年七十餘病疽其子裂肝以療尋愈八年李守迪大書刻名石所居里曰申孝以貽其家之世德云

施氏達從母中奉廷臣妻嘗書守身二字勉其夫陳古靈守郡延廷臣訓其子後第進士母廣陵郡君年九十餘與妻迎養數聚千指鳴鼓會食五從同炊郡以事聞詔封仁壽縣君仍賜冠帔洪內翰為

記

武進

宋

吳欣之弟慰之元嘉末為武進縣史隨王誕起義會
華欽軍至衆駭散慰之獨留被執將死欣之詣欽
請代兄弟皆獲免齊建元三年有詔旌表

無錫

晉

華寶父豪義熙末戍長安年八歲臨別謂曰我還為

汝冠後長安陷寶年至七十不婚冠或問之不忍
答輒號慟彌日齊建元三年詔表門閭陸羽云惠
山華波寶所築也

宜興

齊

吳達之嫂亡傭直給喪具從祖弟欽伯夫婦歲饑被
略達之有田數畝售以續郡命為主簿因遜兄又
以先世舊田與族弟弟亦不受棄為閒田建元三
年詔表門閭

黃氏蔣雋之妻夫早世誓不踐二庭家人逼之欲自
劉乃已建元三年詔表門閭

陳元子四世同居百有七口建元三年廉使上其事
詔表門閭仍蠲租賦

重脩毗陵志卷第十九

